

真珠船目錄

卷一

說築傅巖

四岳

年號犯古

陰譴

隴上異獸

葵

覆水不收

公主翁主

涇屬渭汭

牛蠶

奉承御史



掘塹

有又

告訐

蒸邕有後

削城角



卷二

鶴尾

誌銘

墳碑之制

鐘室草

浮梁二令

苦蕒之異

外國人進士

茄蓮

性與天道

雙頭蓮

地理

商賈之服

側室死節

武職不守喪

漕河

正學祠

二老奇遇

警枕

趙高之詐

隸書

秦聲

撲朔

五父之衢

賭博

兩造

關中無舊族

卷三

斷竹之歌

北曲

磬

罰飲

君苗

南北音

簫

琴

知醫

蛙給廩

離合體

越絕書

福堂

漁父瀨女

死生冥定

臨刑飲酒

事機難測

子晉劉安

軒渠

側厚

讀書法

唐文粹

文選

感孕之異

沈存中論星月

精為星

卷四

合口音

蒸字韻

元曲

戒石銘

權臣官銜

識緯書名

齊氣

齊民

障泥

含銜音義

親王公主禮

馮夷

偽學

巨人

龍九子

黃金

行藥

博學

宋僉事女

房庶論樂

卷五

戰車戰船

剝

董賈

摹姑

東籬

甜酒

盧坦之言

夫妻義絕

滕茂實

喬文惠上梁文

汎濫追呼

黍

稷

梁

稊

反另

已字三音

詩人幸不幸

厠踰

粉羨

爐酒

毗狸

二王公不私

王忠肅娶妾

盛名高謫官

無字碑

西瓜

卷六

梁顥

藥巴

吏道膺仕

殷浩語

謝小娥

空桑

幼慧

酒禁

臥視書

精舍

破頭話

太子廟

翰林知縣

大臣處林下

稱閹人字

腋氣

黃州傳奇

薦福牛頭

竹實竹飜

古木不宜伐

女化男

領巾

統萬城

懷遠鎮

卷七

裝潢

臨摹硬黃響榻

水晶鹽

堯舜禹湯并謚

馬踐楊妃

顧姑

日月蝕

黃金臺

古人名字人少知者

陶淵明用古詩

婦人行狀

氈根

鷄鳴度關

不死酒藥

韓蘄王夫人

荒雞

夜短

日南斗北

天地之中

天祿邪辟

崆峒

皋比

白水

閔子騫贊

秦皇隋煬武后

張浚傳

上元張燈

雙

天府陸海

卷八

居庸關

七言詩始

烏鵲填河

西翰林

折像

曹状元

蒼雅

奇器不傳

許賽

左袒

漢書踈畧

蟬不翼鳴

雍門

倉頡

胡顏

龍涎

首虜

二烈婦詩

五曲江

甄仕半祿

蒲輪

泰卦

京官騎驢

真珠船卷一

王徽之有云。觀書每得一義。如得一真珠船。余每開卷有得及他。值異聞。輒喜而筆之。日擊月擷。間參獨照。時序忽忽。爰就茲編。遂總謚曰真珠船。雖非探之龍頤。頗均剖之螭腹。集於博奕。良已勤矣。顧井見不廣。疵類定繁。魚目混陳。貽笑螿子。采而擇之。尚仰賴於朱仲云爾。

嘉靖戊申八月之望。關西蒙谿山人胡侍

說築傅巖

說命曰。說築傅巖之野。孔氏傳云。傅氏之巖有澗水。



壞道常使胥靡刑人築護此道說賢而隱代胥靡築之以供食至蔡氏不從其說乃云築居也今言所居猶謂之卜築余按孔子語子路云傳說負壤土釋板築而立佐天子孟子云傳說舉於板築之間莊子云傳說胥靡墨子云傳說被褐帶索庸築傳巖屈原離騷云說操築於傳巖賈誼鵬賦云傳說胥靡兮乃相武丁班固公孫弘贊云版築飯牛之朋崔駰達旨云役夫發夢於王公張衡應問云委甬築而據文軒夏侯湛抵疑云傳說操築以寤主羊祜讓開府表云有遺德於版築之下郭璞三蒼解詁云板牆上下板築杵頭鐵杵也王子年拾遺云傳說賃爲赭衣舂於深岩以自給蕭綺序錄云傳說去其舂築釋彼傭賃應翹旌而來相沈約恩倖傳論云板築賤役也傳說去爲殷相右諸說皆遠出蔡氏前並同孔傳且孔孟莊墨去殷皆未大遠言必有據不知蔡氏何所見而不之從也

涇屬渭汭

禹貢涇屬渭汭蔡傳謂涇渭汭三者皆水名而汭入於涇鄒季友尚書音釋云涇水先會汭水後入渭水則經當言涇屬汭渭不當先渭而後汭况下文即有

渭汭字不可異釋當從孔傳水北曰汭黃東發日抄云古註謂水內爲汭若如古說涇入於渭水之內而漆沮既從澧水攸同皆主渭言之文意俱協若以汭爲一水而入涇則涇屬渭汭者是涇既入渭汭又入涇下文漆沮之從澧水之同孰從孰同邪兼經云涇屬于渭而乃云汭入于涇文恐相反又下文會于渭汭若二水則不以會言矣恐渭汭合依古說臧方氏其川涇汭易氏解云汭非禹貢之汭禹貢言汭皆水內此川名余按蔡氏解堯典媯汭云爾雅曰水北曰汭亦小水入大水之名蓋兩水合流之內也故從水

從內又解東過洛汭云洛水交流之內今却自背其說當爲職方氏所誤而未覩易氏之解耳况導渭之下止言澧涇漆沮絕不及汭足見蔡氏之失

#### 四岳

堯典咨四岳蔡傳云四岳官名一人而總四方諸侯之事舜典乃曰覲四岳蔡傳云四岳四方之諸侯二解不同未詳孰是余意謂四方諸侯者爲得蓋言日覲則既非專指一人而俾又洪水及異位又皆極大事亦不應獨咨一人而决况言下卽有僉曰師錫之對獨咨一人而衆人同辭越對恐無是理

牛蚕

牛蚕並有大功於人而皆不免於鼎鑊余聞錫蘭國不食牛肉止食其乳牛死即埋之私宰者罪死或輸金如牛首以贖罪又于闐國不殺蚕蛾飛盡乃得治繭彼其牛蚕顧獨何幸也

年號犯古

宋太祖將改元諭宰相曰年號須擇前代所未有者乃建號乾德既而聞竇儀之言始知蜀主王衍嘗有此號遂發宰相須用讀書人之歎然國朝永樂之號實有犯於張遇賢及方臘而天順則楊安兒及阿

速吉八亦並稱之正德之名又與雲南段思廉及夏主乾順所建者適同或者其以僭偽之稱不足算乎抑偶未之考也

奉承御史

弘治甲子山東鄉舉某御史監試偶閱一卷顧左右曰此卷雖佳但文體頗古恐不利會試耳某布政侍坐輒起拱手曰實是忒古御史訝曰公初未嘗閱此卷何以知其古布政惶恐對曰大人說他古必定是忒古了御史為之啓齒左右無不匿笑

陰譴

臨潼殷富之弟貴素不弟嘉靖初死三日復生氣息猶惓惓輒匍匐向富叩頭曰弟自今再不敢慢兄矣富訝問故貴曰始貴病革被二卒縛之赴城隍廟及門是東街某秀才枷項立門側執簿唱名以進群罪人及貴乃訝曰汝亦至此邪咨嗟頓足久之願貴入已而陞陞卒摔貴令跪貴不敢仰視俄聞殿上厲聲曰汝何得慢汝兄罪合杖百當有數獍鬼摔貴下陞蓋將杖之墀中貴不勝惶思捩首向殿上大呼曰貴愚蒙不知禮法請自今改過再不敢慢兄即聞殿上召貴還曰汝果能改姑免汝杖遂縱貴令歸及墀中

則見北街鄭優一家皆遭拷掠備極慘毒又以鐵鈎鈎其家長脊筋挂樹枝上痛楚之聲所不忍聞趨至門則某秀才迎貴喜曰汝有何功德乃得復歸幸甚幸甚吾有小事浼汝吾生時曾以白金三兩著不借中埋寢榻下汝可召吾子令發取少濟貧乏吾以盜食丁祭肉被枷已將三年不父限滿幸無他大過當轉生令吾子及妻勿憂念也言訖啜泣殷勤揖貴令亟返貴方趨走迷途一跌而寤不意復得見兄因召秀才子語之故果如言得白金亡何鄭優闔門皆疫死而其家長獨以背疽云殷富及邑人賀郡丞說

掘塹

隋文帝開皇間突厥啟民歸男女萬餘長孫晟奏請徙五原以河為固於夏勝之間東西至河南北四百里掘為橫塹令處其內使得畜牧王司馬瓊謂古亦掘塹見於此余按塹亦作濼亦作塹秦紀始皇通自九原至雲陽因邊山險塹谿谷又塹山堙谷千八百里又濼河旁漢高紀深濼而守是錯傳高城深塹相如傳隕墻填塹陳湯傳穿塹趙充國傳濼壘木樵潘岳馬汧督誅剌以長塹劉良註剌掘也梁書韋叡傳夜掘長塹掘塹之事不始見於隋也

隴上異獸

唐長慶二年五月有自吐蕃至者稱隴上自去歲以來出異獸如猴而腰尾皆長色青迅猛見蕃人即捕而食之遇漢人則否方今閩外乏材安得此獸數千分布九邊以禦獯鬻

有又

有又二字古通用故詛楚文云又秦嗣王而字書解有亦曰又也禹貢云作十有三載乃同謂十載而又三載也秦誓惟十有三年洪範惟十有三祀無逸享國七十有五年義並同洛誥云在十有二月謂十月

而又二月也伊訓十有二月春秋十有一月義並同  
曹娥碑云旬有七日謂旬日而又七日也後漢鴻臚  
陳君碑及魏大饗碑旬有八日韓愈復上宰相書十  
有九日義並同惟初旬之日不可復用有字如曆中  
初七月初八日謂初旬之七日八日也既謂之初何  
又之有猶二年不可曰有二年秋七月不可曰秋有  
七月也故漢衛尉衡方碑止云二月五日魏繁欽與  
文帝牋止云正月八日韓愈上張僕射書止云九月  
一日此類不能枚舉近有撰金石文而云初有五日  
初有七日者義殊不通

### 葵

葵之種類不一有丘葵廣雅曰歸丘葵也有胡葵廣  
志曰其花紫赤有冬葵陶隱居曰以秋種葵覆養經  
冬至春作子謂之冬葵本草圖經云苗葉作菜茹更  
耳美管子曰桓公北伐山戎得冬葵布之天下是也  
有蜀葵爾雅所謂蒼葵者也郭璞云如木槿華戎  
蜀蓋其所自因以名之花有五色有紅者又號一丈  
紅又有黃蜀葵與蜀葵頗相似葉尖狹多刻缺夏末  
開花淺黃色蕊心下作紫檀色本草衍義云與蜀葵  
別種非為蜀葵中黃者也有錦葵花小葉圓有終葵

一名落葵一名天葵一名繁露一名承露一名藤葵  
爾雅所謂葵葵繁露是也郭璞云大莖小葉紫黃色  
陶隱居云人家多種之葉惟可鉶鮓子紫色女人以  
漬粉傅面為假色俗呼為胡燕脂蜀本圖經云蔓生  
葉圓厚如杏葉子如五味子生青熟黑所在有之食  
療云其子令人面鮮華可愛取蒸烈日中曝乾按去  
皮取仁細研和白蜜傅之甚驗博物志云人食落葵  
為狗所齧作瘡則不瘡有龍葵本草唐本註云即關  
河間謂之苦菜者葉圓花白子若牛李子生青熟黑  
但堪煮食不任生噉孟詵云其味苦按去汁食之食

醫心鏡云龍葵作羹粥食之並得圖經云惟北方有  
之北人謂之苦葵葉圓似排風而無毛有菟葵爾雅  
曰菟葵葵郭璞註云頗似葵而小葉狀如藜有毛洵  
啖之滑廣志云兔葵淪之可食本草唐本註云苗如  
龍芮葉光澤花白似梅莖紫色煮汁極滑堪食劉禹  
錫所謂動搖春風者也有荆葵一名芘芥爾雅曰菘  
蚘蚘是也郭璞註云似葵紫色陸璣云似蕪菁華紫  
綠色可食微苦有錢葵叢低又一種千葉可愛有鳧  
葵馬融傳曰桂荏鳧葵葉圓似尊生水中一名水葵  
有蒲葵可食葉似葵而大中作扇謝安取蒲葵扇中

者捉之是也有露葵顏氏家訓云蔡朗父諱純遂呼  
蓴菜為露葵王維詩云松下清齋折露葵意謂帶露  
之葵不指蓴菜蓋蓴菜非輞川所有宋玉諷賦云烹  
露葵之羹曹植七啓云霜蓄露葵語並在蔡朗前亦  
不指蓴菜有楚葵即水中芹菜有澤葵即莓苔鮑昭  
蕪城賦澤葵依井是也齊民要術又有鴨脚葵紫莖  
葵白莖葵春葵秋葵余按葵類雖多鮮不堪茹古人  
重之故豳風七月烹葵周禮醢人饋食之豆其實葵  
菹儀禮贊者一人執葵菹以授主婦公儀休食葵而  
美魯監門女嬰謂馬佚食園葵歲利亡半魯漆室女  
謂馬佚踐園葵使終歲不厭葵味崔寔云六月六日  
可種葵中伏後可種冬葵九月作葵菹乾葵潘岳閑  
居賦菜則綠葵含露齊周顒荅王儉云綠葵紫蓼荆  
楚歲時記云仲冬菜經霜蕪菁葵等雜菜乾之並為  
鹹菹齊民要術有種葵法甚詳又謂種葵三十畝勝  
作十頃穀又爾雅翼云葵為百菜之王味尤甘滑今  
人絕不食此是以亦鮮種之不知何故余也葵藿之  
姿意將訪諸老圃廣藝茲品以當梁肉

告訐

訐以為直孔子所惡漢書刑法志云孝文懲惡亡秦





P 10

之政論議務在寬厚恥言人之過失化行天下告訐之俗易吏安其官民樂其業宋勅諸不干已輒告論者杖一百其所告事不得受理真西山帥長沙咨目云告訐乃敗俗亂化之原有犯者自當痛治何可勾引今官司有受人實封狀與出榜召人告首陰私罪犯皆係非法不可爲也又諭俗榜云事不干已輒行告訐裝撰詞說夾帶虛實如此之類皆是無理黃東發引放訐訟榜云不干已事不受胡太初畫策緒論云告訐者未問虛實先坐不應爲罪若狀詞本訐之外因而告首其家隱微者亦勿聽理併先坐罪茲皆

件開欵施行其不干已者明白開欵立案不行可見不係叛逆機密及人命有主若侵盜錢糧不係在官者併他不干已事皆所不准又云在外刁徒身背黃袱頭插黃旗口稱奏訐直入衙門挾制官吏者所在官司就拏送問若係干已事情及有冤枉者照常發落不係干已事別無冤枉并追究主使之人一體問罪屬軍衛者俱發邊衛克軍屬有司者俱發口外爲民可見訐告不干已之罪視干已爲重觀於三例則訐告之禁亦鄭重矣近者傾險小人專伺察人陰私萋菲其辭訐諸當路以逞憤嚇財或緣睚眦之愆泛

引滔天之豐而憐酷之吏不識大體不畏天刑不考  
故典不遵明禁不惟不之懲沮顧獎與姦才資為囊  
橐畧其干已之故翻窮蔓及之詞至或延巖廉直不  
阿之善人株逮良家閨閣之淑媛追發遠年有主之  
枯骼淫刑之下何所不承萬分有一幸而得直則獲  
辱已莫浣為費已不貲矣雷政一彰刁吠亢起訟牒  
猥積獄繫滋繁冤號之聲徹於昊蒼鬱抑之氣塞於  
里巷茲淳風所以不復災沴所以不弭也噫

覆水不收

光武本紀云反水不收何進傳慕容超傳並云覆水

不收李白詩水覆難再收又覆水再收豈滿杯劉禹  
錫詩金盆已覆難收水皆用太公語太公初娶馬氏  
讀書不事產馬求去太公封齊馬求再合太公取水  
一盆傾於地令婦收水惟得其泥太公曰若能離更  
合覆水定不收

蔡邕有後

漢書謂蔡邕女蔡琰沒胡中曹操素與邕善痛其無  
嗣乃遣使者以金璧贖之而重嫁於董祀余按晉書  
后妃傳景獻羊皇后父衛上黨太守母陳留蔡氏漢  
左中郎將邕之女也又羊祜傳祜蔡邕外孫景獻皇

右同產弟祜討吳有功將進爵土乞以賜舅子蔡襲  
詔封襲關內侯是邕未嘗無嗣其女亦不止董祀妻

### 公主翁主

春秋公羊傳天子嫁女於諸侯必使諸侯同姓者主  
之故謂之公主漢書百官表諸王女曰翁主顏師古  
曰天子不得親主婚故謂之公主諸王即自主婚故  
其女曰翁主翁父也言父主其婚亦曰王主言王自  
主其婚王吉傳漢家列侯尚公主諸侯則國人承翁  
主晉灼曰娶天子女曰尚公主娶諸侯女曰承翁主  
尚承皆卑下之名今制親王女曰郡主郡王女曰縣  
主然則國人娶之者皆宜曰承或謂之尚非也

### 削城角

俗傳誅不孝於市則削其城之一角按苻堅傳初石  
虎末清河崔悅為新平相為郡人所殺悅子液後仕  
堅為尚書郎自表父讎不同天地請還冀州堅愍之  
禁錮新平人缺其城角以恥之新平即今邠州其城  
尚缺西南角然則俗說亦有由也寧夏城亦缺東北  
角志謂示不滿之意侯考

### 真珠船卷一

真珠船卷二

鶴尾

朱晦菴詩傳謂鶴身白頸尾黑然尾實不黑黑者其兩翼之末耳

雙頭蓮

雙頭蓮即合歡蓮一名嘉蓮一名同心蓮自是一種不足為瑞

誌銘

墓石之文俗稱前序為誌而謂後之韻語為銘此謬說也按說文誌記也銘亦記也非有散文韻語之別

也蓋散文序事自誌銘之前序耳故古人於誌銘題下往往復著并序二字足見後之韻語方是誌銘韻語雖例稱銘亦可稱誌是以任彥升於劉夫人江文通於孫緬韓退之於盧渾並單用韻語而總稱墓誌梁簡文於何徵君韓退之於孟貞曜柳子厚於襄陽趙丞散文與韻語並施而亦直稱墓誌王融於豫章王謝朓於海陵王沈約於長沙王皆無散序而咸稱誌銘然誌銘連稱語義重複若謂誌之以銘似亦頗通又韓退之於張法曹李楚金及乳母皆只用散文不假韻語而亦謂之墓銘蓋後有韻語則散文為前

序無韻語則散文即誌銘

地理

呂才陰陽書序畧曰禮天子諸侯大夫葬皆有月數是古人不擇年月也春秋九月丁巳葬定公雨不克葬戊午日下昃乃克葬是不擇日也鄭葬簡公司墓之室當路毀之則日中而窆子產不毀是不擇時也古之葬者皆於國都之北兆域有常處是不擇地也今葬書以為子孫富貴貧賤壽夭皆因卜葬所致去子文為令尹而三已柳下惠為士師而三黜計其在隴未嘗改移而野俗無識妖巫妄言遂於擗踊之際

擇葬地以希官爵荼毒之秋選時日以規財利傷教  
敗禮莫斯為甚司馬君實葬論畧曰將葬太尉公族  
人皆曰葬者家之大事奈何不詢陰陽吾兄伯康無  
如之何召張生許以錢二萬張生世為葬師為野人  
葬所得不過千錢聞之大喜兄曰汝能用吾言吾俾  
爾葬不用吾言將求他師張曰惟命是聽於是兄自  
以已意處歲月日時及壙之淺深廣狹道路所從出  
皆取便於事者使張生以葬書緣飾之曰大吉以示  
族人族人皆悅無違異者今吾兄年七十九以列卿  
致仕吾年六十六忝備侍從宗族之從仕者二十有

三人視他人之謹用葬書未必勝吾家也前年吾妻  
死棺成而歛裝辦而行壙成而葬未嘗一言詢陰陽  
家迄今亦無他故欲知葬書不足信視吾家楊廷秀  
與李侍講書畧曰景純葬書東漢以前無有景純忠  
義以死大節固卓然豈不前知其故而逆善其先人  
之窀穸乎已既無驗於人何有張敬夫題贈地理卷  
後畧曰吉凶由人盡信書不如無書且以不才之子  
不學之儒有能以地理而取科第者乎不仁之人不  
善之家有能以地理而保生產者乎不業之農不耕  
之田有能以地理而成穀實者乎羅大經風水論畧

曰古人卜其宅兆乃孝子慈孫謹重親之遺體使異日不爲城邑道路溝渠耳借曰精擇亦不過欲其山水迴合草木茂盛使親之遺體得安豈藉以求子孫富貴乎郭璞謂本骸乘氣遺體受蔭此說殊未通夫銅山西崩靈鐘東應木生于山粟芽于室此乃活氣相感今枯骨朽腐不知痛痒積日累月化爲朽壤豈能與生者相感以致禍福且人之生貧富貴賤賢愚壽夭稟賦已定謂之天命不可改也豈冢中枯骨所能轉移如璞之說則上天之命反制於一抔之土矣近時京丞相仲遠豫章人也崛起寒微祖父皆火化無墳墓每寒食野祭而已是豈因風水而貴哉右數說可謂卓識確論錄之以祛沉惑

### 墳碑之制

唐六典五品以上立碑螭首龜趺上高不過九尺七品以上立碑圭首方趺上不過四尺若隱淪道素孝義著聞雖不仕亦立碣金石例三品以上神道碑五品以下不銘碑謂之墓碣大明會典五品以上許用碑六品以下許用碣庶人止用壙誌公侯及一品碑螭首龜趺二品碑盖用麒麟三品碑盖用天祿辟邪並龜趺四品以下並圓首方趺高低各有尺寸



白虎通天子墳高三仞樹以松諸侯半之樹以栢大夫八尺樹以欒士四尺樹以槐庶人無墳樹以楊柳大明會典官民塋域廣袤步數有等五品以上有圍墻六品以下無圍墻親王享堂七間郡王五間一品至三品俱三間非勅修者無享堂今人僭踰侈越無復等別由學士不講有司不申明耳

### 商賈之服

漢高帝八年令賈人毋得衣錦繡綺縠苻堅制金銀錦繡工商阜隸婦女不得服之犯者棄市洪武十四年令農民之家許穿紬紗絹布商賈之家止穿絹布

如農民家但有一人為商賈亦不許穿紬紗今農民締髡不蔽體而商賈之家往往以錦綺為襦袴矣

### 鐘室草

未央殿東北二里許蓋鐘室故處有丈餘隙地草色皆殷赤傳是韓淮陰血漬而然按莊子伍員流于江蓑弘死于蜀藏其血三年而化為碧台州志王貞婦為元兵所劫至嶧縣清風嶺齧指出血書字山石投崖死血漬石間天且陰即墳起如始書永新志譚節婦趙氏被元兵併其子殺之血漬禮殿間八磚上宛然一婦人抱嬰兒狀或磨以沙石不滅又煨以火益

顯至今如初夫義烈之人賡憤強歿英氣過抑宜其血亦異常鐘室之草不足怪也

側室死節

嘉靖七年長安人馬憲副應祥卒側室劉氏京師人年才二十餘縊死棺側西安有司謂妾無旌表例遂不 上聞余按國初良鄉魏成死妾周氏守節三十餘年事聞旌其門御史許顥真定高邑人病卒二妾陳氏牛氏皆經死旌為雙節鹽課副使胡以謙江西寧州人永樂初卒妾金陵周氏負屍歸葬斷髮育孤閨門無玷正統間旌其門成化間樂平喬侍郎毅卒

側室高氏縊死樞傍旌其門曰貞烈有司構祠祀之城武高位死妻陳氏妾王氏並自縊弘治十一年旌曰雙烈弘治十七年徐定公永寧卒側室丁氏縊於公之寢室旌其門曰貞烈秦安州王詰妾劉氏正德六年遇賊投井死旌其門曰貞烈西安有司不知何以不之援也宋端平二年高郵妓毛惜惜死於滌全之難遂得錫封英烈夫人且賜廟祭蓋旌獎義烈以立世教初不可以貴賤論而劉氏良家子顧不得儕於一妓可勝恨哉

浮梁二令

洪武中洛陽房殖知浮梁縣貪暴萬狀民不堪命相  
率縛赴京師 詔戮於市永樂中趙城賈宣亦知浮  
梁以忿載邑民熊世康於舟將沉之世康之弟救免  
縛宣致之臬司贓貨狼藉臬司欲擬重典會赦止沒  
其贓褫職為民歸鄉暴死右二令罪固不容誅而浮  
梁之民輒敢加以束縛若待盜賊犬豕然似難以訓  
但貪酷之吏肆其殘噬固有甚於盜賊犬豕而又賄  
結權要莫之誰何浮梁之舉亦足示警

### 武職不守喪

武職親死例不解職守喪禮三年之喪達乎天子武

職非身出空桑柰何獨否岳武穆當獵狃孔棘國家  
倚重丁母姚憂乞守終喪累詔促起乃勉奉命已而  
竟解兵柄持服終喪今腹裏武職任同散僚既非孔  
棘之時了無乞守之請忘慟所天領官知故敗教傷  
義關係匪輕桓寬云古有大喪者君三年不呼其門  
通其孝道遂其哀戚之心也僵屍衰經而從戎事非  
所以子百姓順孝心也今武職身丁鉅喪從非戎事  
而衣錦揚揚衰經不用桓寬見之更將奚議乎

### 苦賣之異

弘治八年八月三日湖廣撫臣徐恪奏長沙地名白

鶴樓民家園內有苦蕒菜開蓮花七日方謝按吳歸  
命侯天紀三年八月有蕒菜生工人吳平家高四尺  
三分如枇杷形上圓徑一尺八寸莖廣五寸兩邊  
生葉綠色晉義熙二年九月營士陳蓋家有苦蕒菜  
莖高四尺六寸廣三尺二寸厚三寸唐景龍二年郿  
縣民王上賓家有苦蕒菜高三尺餘上廣尺餘厚二  
分皆足為異然開蓮花者未之間苦蕒即苦苣

### 漕河

成化元年西安守青神余公子俊自終南義谷口引  
灃水一支由西南入省城給居民汲飲俗名漕河按

漢元光六年春穿漕渠通渭唐大曆元年京兆尹黎  
幹自南山谷口開漕渠抵景風延熹門入苑以運南  
山薪炭十道志漕水即沉水也是則漕河即古之漕  
渠漕水歲久湮塞余公不過因其故道而為之雖狹  
不容舳舻然猶得蒙故號漕字有二音一財勞切一在  
到切財勞切者衛邑名詩思須與漕野處漕邑土國  
城漕是也在到切者水轉穀也王隆小學篇以水通  
輪曰漕漢書蕭何傳轉漕關中張良傳河渭漕輓是  
也漕河之漕既以轉輸為義則讀以在到切者為是  
今人多不知漕有在到之音遂誤讀漕運之漕為財

勞切漕河之漕雖讀作在到切而不知即漕字却妄  
意書作淖字淖在早切上聲不音在到切

外國人進士

本朝文教覃及海外是以外國英才學於中國而登  
進士科者亦多有之洪武四年辛亥科金濤高麗延  
安縣人景泰五年甲戌科黎庸交趾清威縣人阮勤  
交趾多翼縣人天順四年庚辰科阮文英交趾慈山  
縣人何廣交趾扶寧縣人成化五年己丑科王京交  
趾縣人阮勤仕侍郎子孫占籍山西長子縣

正學祠

陝西會城有正學祠以祀秦中道學之賢如張橫渠  
呂藍田蕭維斗等而程明道以嘗簿於鄆亦得與又  
以周濂溪為明道師程伊川為明道弟因遂推祀余  
謂此祠既專為秦人之正學設則伏羲黃帝倉頡伊  
尹文王周公尤正學之冠冕秦祖穰馬赤燕伋石作  
蜀並孔門之高第反不得俎豆其間殊為闕典若明  
道自鄆之名宦濂溪伊川之祀更為無謂皆宜禡去

茄蓮

今涼夏有茄蓮頗似蘆菔而其脆過之飲膳正要出  
菽蓮兒註云是菽蓮根圖狀絕類茄蓮想即其物

二老奇遇

崑山周壽誼享年百有十六歲

高皇嘗召見賜酒饌殿中蠲其家丁役無錫茹文中居京師之高坡衎衎享年百有十歲

英皇復辟之元亦召見便殿予冠服帶履宴順天府又命公卿造其居賀之茹之孫知州鳴玉長史鳴鳳按察副使鳴金皆余執友也周之後未聞

性與天道

黃東發於論語性與天道云子貢明言不可得而聞諸儒反謂其得聞而嘆美豈本朝專言性與天道故自主其說如此邪要之子貢之言正今日學者所當退而自省也又於性相近也去子未嘗言性言性止此一語何今世學者言性之多也余謂東發之言尤今日學者所當退而自省也

警枕

警枕不始於司馬溫公吳越王錢鏐有警枕蔡中郎有警枕銘禮記少儀弓茵席枕几穎杖琴瑟戈註云穎警枕也謂之穎者穎然警悟也

趙高之詐

應劭風俗通義曰秦相趙高指鹿為馬束蒲為脯二

世不覺故潘岳西征賦曰野蒲變而成脯苑鹿化以  
為馬張銑註云趙高欲為亂恐群臣不聽乃先設驗  
以蒲為脯以鹿為馬獻於二世羣臣言蒲言鹿者皆  
陰誅之禮器曰或素或青夏造殷因註云變白黑言  
素青者秦二世時趙高欲作亂或以青為黑黑為黃  
民言從之故崔琦對梁冀曰將使玄黃改色馬鹿易  
形乎是趙高之詐不但史記指鹿為馬一事

### 五父之衢

五父魯衢名猶齊之莊嶽檀衢也家語云孔子母死  
殯於五父之衢春秋左傳云季武子作三軍詛諸五

父之衢韓非子云子路要作溝者於五父之衢而於  
之皆其處也杜預云五父衢道名在魯國東南有渠  
以凡通衢為五父之衢者非是

### 隸書

庾肩吾云隸書今之正書張懷瓘云隸書云者程邈  
造字皆真正亦曰真書王羲之傳云尤善隸書項氏  
家說程迥辨隸書曰周興嗣千文杜蘂鍾隸蕭子雲  
啓云論草隸法逸少不及元常子敬不及逸少任珩  
五體序云隸則羲獻鍾庾歐虞顏柳八分則酌乎篆  
隸之間者也書苑云蔡文姬言割程隸字八分取二

分割李篆字二分取八分於是為八分書以諸家參之則今之稱隸者八分書古之稱隸者真行書也唐與國初並無此誤自歐陽以來始誤故少游遂疑程邈帖不當為小楷疑非秦書蓋不知先有真書後有八分書也法書要錄云丁覘與智永同時善隸書世稱丁真永草唐六典校書郎正字所掌字體有五一古文二大篆皆不用三小篆印璽旗幡所用四八分石經碑碣所用五隸書典籍表奏公私文疏所用郭忠恕云小篆散而八分生八分破而隸書出隸書悖而行書作行書狂而草書聖趙明誠云誤以八分為隸自歐陽公始歷觀前說則今之真書即是隸書無疑而學人猶徃徃承誤謂八分為隸書聞稱真書為隸者翻共訾笑是以俗有真草隸篆之語余詳舉之用示蒙學

### 賭博

王叔永宋朝燕翼詒謀錄云世惡少無賴賭博輸錢無以償則為穿窬若黨類頗多則為劫盜縱火行姦殺人不防其微必為大患淳化二年詔相聚蒲博開櫃房令開封府嚴戒坊市捕之犯者定行處斬引匿不以聞與同罪所以塞禍亂之源驅斯民納之善也



其後刑名寔輕而法不足懲姦犯之者衆蒞官視此為不急之務知而不問者十常八九因訢到官有不為受理者是開盜賊之門也今問刑條例賭博人犯一等二等者俱問罪枷號而此輩畧不衰止無亦法不足懲而又蒞官者不肯加之意乎

### 秦聲

陳軫對秦王曰臣雖棄逐之楚豈能無秦聲哉蘭相如曰聞秦王善為秦聲請奏缶以相樂李斯上書秦始皇曰擊甕扣缶彈箏搏髀而歌嗚嗚快耳者真秦之聲也楊惲報孫會宗書曰家本秦也能為秦聲嵇康聲無哀樂論奏秦聲則歎羨而慷慨石崇思歸引家素習技頗有秦趙之聲

### 兩造

呂刑兩造具備師聽五辭周禮以兩造聽民訟今有止聽原告之詞而不受被告之訢者其亦偏矣

### 撲朔

蘇東坡遊徑山詩寒窻煖足來朴握註免也古樂府木蘭辭雄兔脚撲朔古文苑作朴握

### 關中無舊族

關中代多兵爭加以飢疫流亡故無舊族漢書高祖

二年關中大飢米斛萬錢人相食民就食蜀漢獻帝  
興平二年關中大飢人相食啖白骨委積又李傕郭  
汜相攻天子東歸後長安城空四十餘日強者四散  
羸者相食二三年間關中無復人跡江表傳舊京空  
虛數百里中無煙火孫堅入城惆悵流涕晉書建安  
初關中百姓流入荊州者十餘萬家又永嘉喪亂雍  
州以東人多飢乏更相鬻賣奔迸流移不可勝數幽  
并司冀秦雍六州大蝗草木及牛馬毛皆盡又大疾  
疫兼以飢饉百姓又為寇賊所殺流屍滿河白骨蔽  
野又慕容冲僭號毒暴關中人皆流散道路斷絕千

里無煙又石季龍滅石生苻洪說季龍宜徙關中豪  
傑及羗戎內實京師季龍從之又桓溫趨長安徙關  
中三千餘戶而歸又麴特等圍長安劉曜連戰敗績  
乃驅掠士女八萬餘口還平陽又永嘉天下崩離長  
安城中戶不盈百墻宇頽毀蒿棘成林又劉聰使子  
粲攻陷長安遣人四千餘家奔漢中又光熙元年鮮  
卑大掠長安殺二萬餘人西魏大統二年關中大飢  
人相食死者十七八唐黃巢入長安捕得官吏悉斬  
之宗室侯王屠之無類納亡命者夷其家巢復入怒  
民迎王師殺八萬人血流於路可涉謂之洗城又秦

宗權所至屠老孺焚屋廬城府窮為荆萊自關中薄  
青齊南繚荆郢北三衛滑千里無舍煙又天復四年  
朱全忠自長安遷唐於洛驅徙士民毀宮室百司及  
民間廬舍長安自是丘墟金紹定三年窩閣台趨鳳  
翔行省平章完顏合達遷京兆人于河南嗚呼當時  
此地之民可哀也哉

漢光武建始二年赤眉燒長安宮室恣殺擄掠中無復人行

真珠船卷二

